

Kalaallit Nunaata eqqaani imartani aningaasaqarnikkut immikkut oqartussaaffigisani Hong Kong-imi isumaqatigiissutip ilaata naammassineqarnera pillugu nalunaarut

Kalaallit Nunaata eqqaani imartani aningaasaqarnikkut immikkut oqartussaaffigisani, avatangiisit illersorneqarnissaat pillugit inatsimmi nr. nr. 1534-mi, 19. december 2017-meersumi, inatsisikkut nr. 431-ikkut, 24. april 2024-imeersukkut allanngortinneqartumi § 22 a, § 31, imm. 1 aamma 2, § 34, imm. 1, § 46, imm. 1, aamma § 47 aamma § 48 malillugit aalajangersarneqarpoq:

Atuuffia, nassuiaatillu

§ 1. Umiarsuarni Hong Kong-imi isumaqatigiissummi ilaatinneqartuni, Kalaallit Nunaata eqqaani imartani aningaasaqarnikkut immikkut oqartussaaffigisani angalasuni, nalunaarut atorneqassaaq. Nunani assigiinngitsuni inatsisitigut naapertuuttumik, umiarsuarnit qallunaat, kalaallilluunniit erfalasuinik erfalasoqanngitsuni, Kalaallit Nunaata eqqaani imartani aningaasaqarnikkut immikkut oqartussaaffigisani, nalunaarut atorneqassaaq.

Imm. 2. Hong Kong-imi isumaqatigiissutip qallunaatut oqaasertai, nalunaarummut ilanngussaq 1-mi ilanngunneqarput.

§ 2. Nalunaarummi matumani tulluuttut ima paasineqassapput:

Allagartaq akuersissut: Siullermeertumik misissuineq imaluunniit nalliuteqqittartumik misissuinerit eqqortumik naammassineqarsimanerat, kiisalu umiarsuarmi atortussat navianartut pillugit nalunaarsuut pillugit umiarsuarmut immikkut ittumut allagartaq akuersissut.

Siullermeertumik misissuineq: Atortussat navianartut pillugit nalunaarsuutip malittarisassanut naapertuunnersoq pillugu nakkutilliineq

Nalliuteqqittartumik misissuinerit: Atortussat navianartut pillugit nalunaarsuutip malittarisassanut naapertuunnersoq pillugu nakkutilliineq.

Atortussat navianartut pillugit nalunaarsuut: Atortussat navianartut sorliit umiarsuarmiinnersut pillugit skiima.

Isumaqatigiissut: Umiarsuarnik isumannaatsumik aamma avatangiisinut illersorneqarsinnaasumik isaterisarneq pillugu Hong Kong-imi isumaqatigiissut 2009-meersoq tassungalu ilanngussaq, nalunaarummut matumunnga ilanngussaq 1-itut issuarneqartoq.

Umiarsuaatilik: Inuk imaluunniit inatsisitigut pisinnaatitaasoq pisussaatitaasorlu, umiarsuarmut piginnittut nalunaarsorneqarsimasoq, matumani inuk imaluunniit inatsisitigut pisinnaatitaasoq pisussaatitaasorlu, umiarsuup tunineqannginnerani imaluunniit umiarsuarnut isaterisarfimmut

tunniunneqannginnerani umiarsuarmik piffissami killilimmi piginnittoq ilanngullugu.

Allagartamut akuersissummut piumasaqaatit

§ 3. Isumaqatigiissummut ilanngussaq 1-imi, kapitali 2-mi, allagartamik akuersissummik umiarsuarmiititaqarnissamut pisussaaffimmut tunngassuteqartup ilaata eqqortinneqarnissaa, umiarsuaatillip qulakkiissavaa.

§ 4. § 3 malillugu allagartap akuersisutip Isumaqatigiissummut ilanngussami 1-imi, kapitali 2-mi sivilissutsumut atuuffissallu pillugit piumasaqaatinik eqqortitsinera umiarsuaatillip qulakkiissavaa.

§ 5. § 3 malillugu allagartap akuersisutip Isumaqatigiissummut ilanngussami 1-imi, kapitali 2-mi ilusissamut aamma oqaatsinut piumasaqaatinik eqqortitsinera umiarsuaatillip qulakkiissavaa.

Nakkutilliineq

§ 6. Nalunaarummi matumani aalajangersakkat eqqortinneqarnissaat Miljøstyrelsen nakkutigissavaa.

Pineqaatissiissutit il.il.

§ 7. Inatsisit allat malillugit iliuusereriikkanut kingunerititat annertunerit pineqaatissiissutigineqanngippata, §§ 3-miit 5 ilanngullugu malittarisassat malillugit allagartamut akuersissummut piumasaqaatinik, sivilissutsumut kiisalu ilusissamut eqqortitsinissaminik ilaginnaasoq, akiliitsisissummit akiliissanngortinneqassaaq.

Imm. 2. Inatsisip unioqqutinneqarneranit ukiut 5 ingerlareersimappata, unnerluussisoqassanngilaq.

Imm. 3. Ingerlatseqatigiiffimmit (inatsisitigut pinnaatitaasumit pisussaataasumillu) nalunaarummi matumani aalajangersakkat unioqqutinneqarnerannut, Kalaallit Nunaanni pinerluttulerinermi inatsimmi kapitali 5 malillugu ingerlatseqatigiiffik akiliitsisissummit akiliinissamut akisussaataasinnaavoq.

Atuutilerfia

§ 8. Nalunaarut ulloq 26. juni 2025 atuutilissaaq.